

Inatsisissatut siunnersuummut oqaaseqaatit

Oqaaseqaatit nalinginnaasut

1. Inatsisissatut siunnersuutip tunuliaqutaa

Siunnersuut partiit 2012-imi aningaasanut inatsisissaq pillugu isumaqatigiinniarnannut atuumassuteqarpoq.

2. Inatsisissatut siunnersuutip imarisai

Imeruersaatit puuisa eqqussuinermi akitsuutaasa qaffanneqarnissaat siunnersuutaavoq, tassa landskarsip isertitaqarnerunissaa siunertaralugu.

Imeruersaatit suulluunniit puuisa, matumani aamma imeruersaatiliassat puuisa, taamaallaat immummit nioqputissiat puui pinnagit, akitsuutaat qaffanneqassapput.

Imeruersaatit puuisa 0,25 literi tikillugu imaqarsinnaasut akitsuutaasa 1 kr.-imik qaffanneqarnissaat siunnersuutaavoq, akitsuut taamaalilluni imeruersaatip puuanut ataatsimut 2 kr.-iulerluni.

Imeruersaatit puuisa 0,25 literi sinnerlugu imaqarsinnaasut akitsuutaasa 1,50 kr.-imik qaffanneqarnissaat siunnersuutaavoq, akitsuut taamaalilluni imeruersaatip puuanut ataatsimut 3,50 kr.-iulerluni.

3. Pisortanut aningaasatigut allaffissornikkullu sunniutissai

Siunnersuut landskarsimut 2012-imi ukiunilu aggersuni 10 mio. kr.-it missinginik isertitaqarnerunissamik kinguneqassangatinneqarpoq.

Siunnersuut pisortanut allaffissornikkut sunniuteqarnaviangilaq.

4. Inuussutissarsiutinik ingerlataqartunut aningaasatigut allaffissornikkullu sunniutissai

Imeruersaatinik pineqartunik eqqussuisuusut atuisartunut pisisartunullu allanut nioqquteqarnerminni akigititaminnik qaffaanissaat ilimagineqartariaqarpoq. Akinik qaffaanerup kingunerisaanik nioqputissat pineqartut tunisaanerisa appariaateqalaarnissaat ilimagineqarsinnaavoq.

Siunnersuut inuussutissarsiutinik ingerlataqartunut allaffissornikkut taasarialimmik sunniuteqarnaviangilaq.

5. Avatangiisinut pinngortitamullu sunniutissai

Siunnersuut avatangiisinut pinngortitamullu taasarialimmik sunniuteqassangatinneqanngilaq.

6. Innuttaasunut aningaasatigut allaffissornikkullu sunniutissai

Akitsuutit qaffaataasa pisisartunut akigititanut tamakkiisumik nammatassanngortinneqarnissaat naatsorsuutigineqartariaqarmat nioqputissanik pineqartunik atuisartut tassaassapput akitsuutitik akiliisussat.

Siunnersuut innuttaasunut allaffissornikkut sunniuteqarnaviannilaq.

7. Naalagaaffeqatigiinnermut Namminersorlutillu Oqartussanut tunngasut

Inatsisissatut siunnersuut naalagaaffeqatigiinnermut tunngasunik imaqanngilaq.

8. Oqartussaasunik soqutigisaqaqatigiinnillu tusarniaaneq

Pineqartoq aningaasanut inatsisissap isumaqatigiinniutigineqarnerata kingunerimmagu tusarniaassutigineqanngilaq.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Siunnersuutaavoq imeruersaatit puuisa 0,25 literi tikillugu imaqarsinnaasut suulluunniit, matumani aamma imeruersaatiliassat puuisa, taamaallaat immummit nioqqutissiat puui pinnagit, akitsuutaasa imeruersaatip puuanut ataatsimut 2 kr.-inut qaffanneqarnissaat.

Nr. 2-mut

Siunnersuutaavoq imeruersaatit puuisa 0,25 literi sinnerlugu imaqarsinnaasut suulluunniit, matumani aamma imeruersaatiliassat puuisa, taamaallaat immummit nioqqutissiat puui pinnagit, akitsuutaasa imeruersaatip puuanut ataatsimut 3,50 kr.-inut qaffanneqarnissaat.

§ 2-mut

Inatsisip 1. januar 2012-imi atuutilernissaa siunnersuutaavoq.